



Rrokum TV
Migjen Kelmendi
Drejtor
Prishtinë

Rasti Nr. 2018/176
Ref:1812/1328/KPM/mf

VENDIM

**Lidhur me Rastin Nr. 2018/176 – Komisioni i Pavarur i Mediave (KPM) për Rrokum TV
("Pala Përgjegjëse")**

Faktet

1. Komisioni i Pavarur i Mediave (KPM) me datën 28 maj 2013 ka nxjerrë Rregulloren për Mbrojtjen e Fëmijëve dhe të Miturve në Shërbimet Mediale Audiovizuale KPM 2013/01. Me këtë rregullore është përcaktuar mënyra e kategorizimit, sinjalizimit dhe zgjedhjes së kohës së transmetimit të programeve të cilat mund të ndikojnë negativisht në zhvillimin fizik, mental, emocional dhe moral të fëmijëve dhe të miturve.
2. KPM me datat 1, 2 dhe 4 gusht 2018 ka bërë monitorimin e programeve të Palës Përgjegjëse, për të vlerësuar pajtueshmërinë me Rregulloren KPM 2013/01.
3. KPM, në bazë të Raportit të monitorimit të datës 17 gusht 2018 ka gjetur se Pala Përgjegjëse ka transmetuar dhe reprizuar serialin "Missing", i kategorizuar si përmbajtje programore 18+, në termine kohore jo të përshtatshme për fëmijë dhe të mitur.
4. KPM, pas të gjeturave nga Raporti i monitorimit, me datën 30 gusht 2018 i ka dërguar Palës Përgjegjëse Njoftim për Shkelje me të cilin e ka njoftuar për shkeljet e bëra dhe i ka kërkuar të veprojë në pajtim me Rregulloren KPM-2013/01, në të kundërtën do t'i rekomandojë Komisionit të KPM-së të ndërmarrë masa ligjore ndaj Palës Përgjegjëse në pajtim me nenin 30 të Ligjit të KPM-së.
5. KPM ka bërë edhe një monitorim të dytë për të parë nëse pas Njoftimit për shkelje Pala Përgjegjëse ka ardhur në pajtueshmëri me Rregulloren KPM-2013/01. Monitorimi është bërë për datat 23, 25, 26 dhe 27 shtator 2018 dhe në bazë të Raportit të monitorimit të datës 9 tetor 2018 është gjetur se Pala Përgjegjëse ka vazhduar të jetë në shkelje të Rregullores KPM-2013/01. Pala Përgjegjëse ka transmetuar filma dhe seriale të pasinjalizuar dhe në termine kohore jo të përshtatshme.

Analiza Ligjore

6. Komisioni bazuar në të gjitha faktet dhe analizat e lartpërmendura konstaton se Pala Përgjegjëse ka bërë shkelje të nenit 6, Koha e transmetimit, paragrafi 3 dhe 4 të Rregullores KPM-2013/01.

Neni 6, paragrafi 3, i Rregullores KPM-2013/01, përcakton se:

“Transmetimi i programeve që i takojnë kategorisë së tretë mund të bëhet prej orës 22:00 deri në orën 06:00.”

Neni 6, paragrafi 4, i Rregullores KPM-2013/01, përcakton se:

“Transmetimi i programeve që i takojnë kategorisë së katërt mund të bëhet prej orës 24:00 deri në orën 05:00.”

Komisioni në bazë të raporteve të monitorimit ka gjetur se Pala Përgjegjëse gjatë ditëve të monitoruara ka transmetuar dhe reprizuar filma dhe seriale, të kategorizuara si përmbajtje programore 14 + dhe 18+, në termine kohore jo të përshtatshme për fëmijë dhe të mitur. Filmi “Obsessed” është transmetuar rreth orës 03:00 dhe 14:00 dhe filmi “Fast and Five 5” është transmetuar rreth orës 17:00, filma këta të vlerësuar nga Departamenti i Monitorimit dhe Analizave si filma që i takojnë kategorisë së tretë. Filmi “Missing” është transmetuar rreth orës 17:00 dhe 21:00 dhe filmi “Sola Mira Hive” është transmetuar rreth orës 04:00, filma këta të vlerësuar nga Departamenti i Monitorimit dhe Analizave si filma që i takojnë kategorisë së katërt. Sipas Rregullores KPM-2013/01 programet e kategorisë së tretë mund të transmetohen prej orës 22:00-06:00 dhe programet e kategorisë së katërt mund të transmetohen prej orës 24:00-05:00.

7. Komisioni gjithashtu ka gjetur se në disa filma dhe seriale të transmetuar Pala Përgjegjëse nuk i përdorë piktogramet e parapara me Rregulloren KPM-2013/01, ndërsa të gjithë nuk i paralajmëron në fillim në mënyrë akustike dhe verbale, duke bërë shkelje të nenit 7, Shenjat dhe piktogramet, paragrafi 1 dhe 3.

Neni 7, paragrafi 1, i Rregullores KPM-2013/01, përcakton se:

“Subjektet transmetuese do të përdorin piktogramet të paraqitura në Aneksin 1 të kësaj Rregulloreje.”

Neni 7, paragrafi 3, i Rregullores KPM-2013/01, përcakton se:

“Para fillimit të programit dhe pas çdo ndërprerje të programit bëhet paralajmërim verbal dhe akustik.”

8. Komisioni ka gjetur se Pala Përgjegjëse edhe pas Njoftimit për shkelje të dërguar nga KPM në të cilin i është kërkuar që të veprojë në pajtueshmëri me Rregulloren KPM-2013/01 ka dështuar të veprojë në pajtim me Rregulloren KPM-2013/01.
9. Komisioni duke u bazuar në faktet e lartpërmendura ka gjetur se Pala Përgjegjëse ka bërë shkelje të nenit 6, paragrafi 3 dhe 4 dhe nenit 7 paragrafi 1 dhe 3, të Rregullores KPM-2013/01.

